

是大臣權書遺之

師古曰以權道為書順辭以答之

然後匈奴之結解

中國之憂平及孝文時匈奴侵暴北邊候騎至雍甘泉

京師大駭發三將軍屯細柳棘門霸上以備之數月廼

罷孝武即位設馬邑之權欲誘匈奴使韓安國將三十

萬眾徼於便墜

師古曰徼要也音工堯反墜古地字

匈奴覺之而去徒費

財勞師一虜不可得見況單于之面乎其後深惟社稷

之計規恢萬載之策

師古曰恢大也

廼大興師數十萬使衛青

霍去病操兵前後十餘年

師古曰操持也

於是浮西河絕大幕

破寘顏襲王庭窮極其地追奔逐北封狼居胥山禪於

姑衍以臨翰海

師古曰積土為封而又禪祭也

虜名王貴人以百數自